

# EFESO

## Polu koyoto epi'ehina fayahi

**1** <sup>1</sup>Oho, Efeso bona'ise. Lenali Hu'mamofihini naga'ise. Lenali Sipi Boti Yesu Kilisitotoga ule'ale hite neminana bona'ise. Nehafihe? Nani Poluita Hu'mamofihini kaga'a lu molo'ehina'mu ya'ma Yesu Kilisitohi aposolo bo lolo hu'ohunamofita fayahi ya'ma koyoto nolepube. <sup>2</sup>Afotifu Hu'ma to Sipi Boti Yesu Kilisitohi aitogati lenehe'mose'na to fuluna'a lenalitoga minomo tito minalibe.

**Kilisitotoga mino heputa'mu mono lusa fato fato'mofihini molo leto'ehina**

<sup>3</sup>Sipi Boti Yesu Kilisitohi afo'afu Hu'ma ai lele'mo fulu huto kokulumaguti mono lusa fato fato'mofihini Kilisitotoga buto mino hepina'mu yabe luto limi'ehina yabe. Limina'mu yabe luto fokehi lilune. <sup>4</sup>Ai ya'ma koyapa kana me'mofihini ana'ina huto mehu'ehigo nani naga'i lolo hilabe luto lele'mo'ehibe. To lali kumu yabe luto Kilisitou ho lifinogo lele'mo eto hinogo foipanati meminenogo to sibina mone laliti meni'igo gobisalo minalabe luto lele'mo'ehina yabe. <sup>5</sup>Ya hite kehelite minalana'mu yabe to Hu'mau lali kumu ginaga fito Yesu Kilisito ai'a yagapana'a lele'mo lolo hilibe luto mehi limi'ehina yabe. Ya'ma hilube luto laga'a besigo fokeha'a li'ehina yabe. <sup>6</sup>Hu'mau ya huto keke nolu letoto ai'a bita hu'ehina pana'a ho lifigo oto lali bati mehina bona'magita lele'mo lamana hu'ehibe. Ya huto hetofana hu'ehina'mu fokeha'a lilata nohune.

<sup>7-8</sup>Kilisitou aiya golaha'atu mina fi letoto foipana nagaluguti gulu ho letalibe luto foipanati li he'mi letalibe luto fili'ehinamo ni'ibe. Ya'mu Hu'mau lalitoga mehi limise'na'a sipi nohina keheli'ohune. <sup>9</sup>To ai'a keheliya ito ya'mamofihini legekesa lu hokolo hu leto'ehina to ya huto ai'a suguna huto molo'ehina ka alihi Kilisitou le'mo huto hilina'a komopa'aguti ma luto lu hokolo hu leto'ehina. <sup>10</sup>Alihi kana'a huto hulenogo Kilisitou ana'ina asaga'i kokulumagu nehanamagi to melugu nehanamagi li nupa napa huto lataha'a lolo hilibe luto ai hiti moneko'na hite minalabe luto lu'ehina.

<sup>11</sup>To silaga'i ya'ma Hu'mau komopa'atu keheliloto lu molo'ehinalo lilata nohibe. Ai'a koyapa kana'a ekesa kehelito lu molo'ehinalo Kilisito hiti moneko'na minalabe luto lele'mo'ehibe. <sup>12</sup>To ya'mu lali Yuta bona'i kohe toto Kilisito kumu agoya hu emito geba huto minota bona'magita lali Hu'mamofihi hetofa gi'a liyafa huto minalune.

<sup>13</sup>To lenali ana suhi hite ka lamana'a Kilisitou lenubuto bilata bo nohina ka kehelite Kilisitohi kehelu ule'ale hite agoya eminogo Hu'mau nani bona'ni minalabe luto ai'a Hetofa Sikalafu'amo lepi'ehina yabe. Koyapa'i lu molo'ehina suhi huto lepi'ehina ni'inagihe. <sup>14</sup>To hena'mube? Hu'mau bona'magi yaga osahi lalu'anigi epilata nehana suhi huto ai Sikalafu'i limilata nohina yabe. To hena'mube? Ai'a bona'amagi alihi epilube luto molo'ehina'a lali'i ana huto liluta kehelilune luto yabe. To Hu'mau foipana nagaluguti pa so letoloto ai'a bona'a lele'malina keheliluna luto ai'a Sikalafu'i limilata nohina ni'ibe. Ya'mu Hu'mamofihi gi'a liyafa huto fokehi hoto minalune.

### **Polu Hu'mamofitoga nunumu lu'ehina**

<sup>15-16</sup>To ya nohigo nani lenali Sipi Boti Yesu kumu kehelu ule'ale hite agoya emilata nemina, to Hu'mamofihi bona'i asagatoga lenemehi epite minelata nehana ka keheliloto lenali kumu luto Hu'mamofitoga fokehi hoba hoba nohuna ya'ma menohe'mube. Lenali kumu yabe luto Hu'mamofitoga lulata nohuna ni'ibe. <sup>17</sup>To Hu'mau Yesu Kilisito Sipi Botimofihi afo'afu, fana meha'a hiti afotifu, ai mehi lepito lenegekesa le'mo hokolo hinogo to Hu'mamofihi hapa'a lu lepilenogo lenali keheliyi ite Hu'mamofihi hapa'a kehelu fotogo hite ya hilabe luto loka nohobe. <sup>18</sup>To lenegekesa yigise'namofihi li hokolo hulenogo Hu'ma hiti alihi mine bati hilana hapa'a kehelilabe luto, to lenali panana'a alihi lepilube luto lu molo'ehina'a kehelilabe luto, loka nohobe. <sup>19</sup>To aitoga agoya hu emi'ohutana bona'magita lalitoga ai amuya'a sipina'auga foya lilata nohina kehelilabe luto, Hu'mamofitoga loka nohobe. <sup>20</sup>Ana amuya'a sipinauga Kilisitou fili'ehinaguti le'mo ho tiloto kokulumagu le'moto tito Hu'mamofihi lamaga'aga le'mo malago mino'ehinamo ni'ibe. Ya'mana amuya'a lali komopatigu ni'ina kehelilabe luto Hu'mamofihi loka nohobe. <sup>21</sup>Kilisitou Hu'mamofihi lamaga'aga nohuto enikibina bo'anifi gamani bofi kaba bofi to amuya bo'anifi enali asaga'i enebe ligito ai moneko'i sipi bo'ani nominabe. To ma melugu nehana enikibina bofi to alihi huto hilina enikibina bofi ai Kilisitou enebe ligito nohigo ai gi'a mino amuya moloto napa huto mino'ehinamo ni'ibe. <sup>22</sup>To Hu'mau asaga'na Kilisitohi maha'alugu li nupa huto molo epoloto ai Hu'mamofihi kehelu'ohuta bona'magihi kaba boti minalibe luto latahati le'mo lolo hu'ehina yabe. <sup>23</sup>To lali Hu'mamofihi bona'magita gumita'a lolo huto nohuto gufa'a lolo hu baga nouta yabe. Ya huto ni'inaya to ai'a silaga'na lolo baga ilata bo nohibe.

### Lemehati fili'ehinaguti lele'mo kosaba hu'ehina

**2** <sup>1</sup>Lenali koyapa'i ka mekehelise minete foipanagu mine'ahana to yamu'i lenemehi filito bigo mine'ahana yabe. <sup>2</sup>Ya'ma kanagu'ya lenali melugu bona'magihi foipa kapogu foipanamofihi komopagu bila ela hite foipa kene'magihi kaba bo'ani Sataha amuyalo minete aitoga i ke'mete minelata hi'ahanamo ni'ibe. <sup>3</sup>Lali asaga'i koyapa'i enali tegi huto minoto komopatimofihi ka laga'a mege'i moloto mega lugufamofihi to kehelise'natimofihi kaga'a keheliya iloto mino'ohuta. Ya huto komopatigu foipa hiti nohutoti enali tegi huto Hu'mau foipana'mu ipakafa osahi limilina suhi huto mino'ohuta ni'ibe.

<sup>4</sup>Ya huto nohutogo Hu'mau ai'a mehi limise'na babu luto minana'mu yabe luto sipi ginaga fi letoto komopa'a limi'ehinamo ni'ibe. <sup>5</sup>Ya nohuto lali foipanatimomu'i lemehati filito bigo nohutogo Kilisitou fili'ehinagati le'mo ho ti'ahanalo lubuto bito lele'mo'ehina yabe. Ya huto ai ginaga fi lepola'ehina'amu lenubuto bi'ehinamo ni'ibe, nekehelifiye? <sup>6</sup>Ai Yesu Kilisito hiti moneka kokulumagu huto minoto asaga'na kaba huto minalune luto lele'mo ho tito aitoga lele'mo hepi'ehina yabe. <sup>7</sup>Hena'mube? Hu'mau ai ya'ma alihi huto huto alina kana'alo yanagu sipi ginaga fi limise'na hiti to hetofa lehe'mose'na'a hiti ya'ma Yesu Kilisito kumu yabe luto lu'ehinamo ni'igo yamofihi nasana'a kehelito minomo buto kehelilune. <sup>8</sup>Nekehelifiye? Hu'mau lali hetofa suhi huto minolatanatilo lubuto bina meni'ibe. O'e, ai'a ginaga fi leto'ehinalo agoya hu nimilata nehana'mu yabe luto lubuto bi'ehina ni'ibe. To ya'ma agoya hu emutana laliti meni'ibe. Ai Hu'mau fa'mene lele'mo ya huto hu'ehina yabe. <sup>9</sup>To ya higo hena hena foya lito minenogo ya'ma suhi lolo hu leto'ehina ni'ibe? Yamofihi meni'ibe. Yamofi kumu lugufa lelito tise'namofihi meni'ibe. <sup>10</sup>Lali Hu'mamofihi yahi fayaha'a nohutogo ai'a Yesu Kilisitotoga molo emutamofihi foya lilabe luto lele'mo huto hu'ehibe. To ana foyamo lite bona'magi enehe'mete minalabe luto koyapa'i lu kehelito molo leto'ehina yabe.

### Kilisitotoga lele'mo moneko hu'ehina yabe

<sup>11</sup>Lenali koyapa'i fegutoga bona'i mine'ahana lenegekesu meheno. To yamofihi kana'agu Yuta bona'magi enali Hu'mamofihi keya'i kumu yabe lite enugufalo laga hi'ahana hiti mine'ahana lenali kumu fayahatini meni'ina bona'i nehabe lite mega enugufalo faya kumu li'ahanamo ni'ibe. <sup>12</sup>Ana kanagu lenali Kilisito hiti hepitemine'ahana ni'ibe. To Yuta bona'i enali fulilo meminese lenali fa'mene ino bano mine'ahana. To Hu'mau ai'a bonatoga lu molo epola'ehina kaga alihi le'mo huto hilina ka yabe luto lu molo epola'ehina kaga lenalitoga lu memalago lenali fegutoga bona'i fa'mene mine'ahana yabe. Lenali

Hu'mamofihi mekehelise nehite ai lele'mo bati hilibe lite mekehelise minete ma melugu fa'mene sibina hite mine'ahana ni'ibe. <sup>13</sup>Lenali ana kanagu foto'i mine'ahana bona'i yatai Yesu Kilisitotoga hepite minago Kilisitohi golaha'auga lenele'mo gegisa'agu lenele'mo malago Hu'mamofitoga nehetite nehabe. <sup>14</sup>Kilisitou ai'a lele'mo fulu hilata bo nohibe. Ai lali asaga'i Yuta bona'i hiti fegutoga bona'i hiti lele'mo fulu higo moneko bona'i lolo nohune. To folagahatigu hasa mino'ehinana li tele bito nohe'mito lele'mo hepi'ehinamo ni'ibe. <sup>15</sup>To ai Kilisitou Yuta bona'magihi keya kamofihi komopa'agu ya'ma lilo melilo lite fato fato ka li'ahanamo ya'ma pa salube luto ai'a gufa'a nohe'mito fili'ehigo ana ka su ho'ehina ni'ibe. To ya huloto lali loe bona'i fatehi mino'ohuta bona'i kosaba naga'i moneko lele'mo huto huloto aitoga lele'mo hepilago lali fulu huto koguna ito nominota ni'ibe. <sup>16</sup>Ai malipu yafalo nofilito lali'i loe bona'i lipakafa lohoto luba sabo huto mino'ohuta yamofihi i laga hu letoto lele'mo moneko huto Hu'mamofitoga lele'mo molo'ehinamo ni'ibe. <sup>17</sup>Ya huto foto'i mine'ahana fegutoga bona'i lenali to lebato'isi gegisagu mino'ohutamo Yuta bona'i lali asaga'i fulunamofihi kaga ka lamana'a lu yege hoto limigo keheli'ohune. <sup>18</sup>Kilisitou ya huto kapo bili letolago lali Yuta bona'i to lenali fegutoga bona'i lali asaga'i Hu'mamofihi Sikalafu'uba lehe'menogo afotifu nohinaga bu nehetilata nohune.

<sup>19</sup>Ya higo yatai lenali fegutoga bona'i fa'mene fato bona'i meneminana yabe. Lenali hiti Hu'mamofihi naga'i enali hiti Hu'mamofihi hepa'i bona'a lolo nehabe. To Hu'mamofihi yagapana'a lolo huto nehabe. <sup>20</sup>Ya huto ni'igo lali Hu'mamofihi bona'i asaga'i nopo tegi huto nominone. Enali aposolo bo to Hu'mamofihi ka lu yege hose bona'i enali lukesa'a lolo hite nehago yamagihi enugupisalo lele'mo malago minomo buto nohune. To Yesu Kilisito ai nohi ya'ma lapusa'a lolo huto nohibe. <sup>21</sup>Ya huto ai nohi asaga'i lele'mo ule'ale higo i ke'moto buto lamana nohi Sipi Botimofihi yabe luto minomo buto sipi huto hiluta nohibe. <sup>22</sup>To lenali hiti bona'i luga'a hiti Kilisitotoga hepilote Hu'mamofihi noha'a lolo hite nehago ai'a Sikalafu'auga ana nonugu minolata nohibe.

### Polu fegutoga bona'i enali kumu luto foya li'ehina

**3** <sup>1</sup>To ya huto ni'igo Poluita nani Kilisito kumu yabe luto ya'ma fegutoga bona'i lenalitoga ka lamana'a lu lepi'ohunamu'i naga nonugu nele'mo mele'ahana ni'igo nani lenali kumu afotifihi loka nohobe. <sup>2</sup>Lenali nani kumu keheli'ahabe luto keheli'ohune. Hu'mau mehi nimito lenalitoga mono foya lilane luto lu neto'ehinamo keheli'ahana ni'ibe. <sup>3</sup>Hu'mau ai suguna kamofihi hapa'a lu huto huto lu nimi'ehinamo ni'ibe lite akeheli'ahanamo ni'ibe. Anana'mu luto ya'ma kohe toto hupa mone'isi fayahi koyoto lepi'ohunamo ni'ibe. <sup>4</sup>Lenali ya'ma leka sete nekehelite nani Hu'mau suguna huto Kilisito kumu lu'ehina suguna

ka'amofihhi hapa'a ya'ma komopa'nituh kehelih fotoguh hutuh kehelihlatana to bu go'ohuna'a lenalih kehelihlabeh luto ana fayahih koyotuh lepi'ohunamuh ni'ibeh. <sup>5</sup>Sugunah kamofihhi hapa'a ya'ma koyapah'i mineh lite bi'ahana bonah'i enalitogah hutuh mehu'ehinamuh ni'ibeh. To yatai kah lamana'a luh yegeh hosh boh to hetofah aposoloh bonah'i enalitogah Sikalahfu'ubah ana sugunah kamofihhi luh hokoloh hutuh luh epilata nohibeh. <sup>6</sup>Sugunah kamofihhi hapa'a mah luto ni'ibeh. Kah lamana'a moloh'ehinamofihhi legeyah'a ya'mah fegutogah bonah'i lenalitogah to Yutah bonah'i enalitogah monekhoh babeyafaloh kogunah monekhoh'i loloh hutuh nehinogoh Yesuh Kilisitoh kumuh yabeh luto Hu'mauh Yutah bonatogah luh moloh epoloh'ehinah lenalih lih hetofah hite lilabeh luto luh'ehinamuh ni'ibeh.

<sup>7</sup>To Hu'mamofihhi kah lamana'amofihhi foyah'a lith keleh keleh'i boh minalane luto luh nimih'ehinah yabeh. Yah hilane luto Hu'mamofihhi hetofah mehih nimiseh'nah'a to ah'a amuyah'a hitih nanitogah lih hutuh hutuh moloh'ehinamuh ni'ibeh. <sup>8</sup>To nani monoh bonah'i limite nehanagutih nani'i limitoh minoh'ohunamofitah nohunayah Hu'mauh mehih nimiseh'nah nanitogah hutuh higo Kilisitotogah kehelih emilata bonah'magihih enele'moh minoh batih batih huseh hapa'a lekah soto soto su meholatanamofihhi kah lamana'a ya'mah fegutogah bonah'i luh hutuh hutuh luh epilane luto yamofihhi foyah'kah'ah luh netoh'ehinamuh ni'ibeh. <sup>9</sup>To Hu'mauh sugunah kamofihhi hapa'a ah foyah'a lith lih su halinamofihhi hapa'a ya'mah nani'nih luh hutuh hutuh nohugoh bonah'i kehelihlabeh luto nele'moh'ehinamuh ni'ibeh. Yah'mah Hu'mauh anah'inah silagah'i lih hutuh hulata nohinah boubah koyapah koyapah'i anah sugunah kah hapa'a ah'a komopah'aguh falah kito minomoh butoh minoh'ehibeh. <sup>10</sup>Henah'mubeh? Yatai Hu'mamofihhi yagapanah'a lalih monekhoh'nah hutuh nominenogoh ya'mah kokulumaguh ageloh enigihitih boh to amuyah'ani hitih boh nehanamagih lalih bu legeleleh Hu'mamofihhi kehelih batih huse'nah fatoh fatoh'mofihhi yatai kehelih batih hilabeh luto ni'ibeh. <sup>11</sup>Hu'mauh ah koyapah'i anah'inah lih hutuh mehu'ohutuh komopah'atuh luh molotoh butoh minoh'ehinamofihhi legeyah'a ya'mah Siph Botih Yesuh Kilisitohih hoh lifigoh limih'ehinamuh ni'ibeh. <sup>12</sup>Ah kumuh luto kehelih amuyah molotoh minototih aitogah hepitoh minenogotih kapoh hokoloh huh letenogoh yah'muh kehelih amuyah molotoh minotoh lelesah melinogoh nohutuh Hu'mamofihhi buloh bu nehetiluneh. <sup>13</sup>Yah'muh yah'mah luto lepilugih keheliloh. Nani lenalih kumuh yabeh luto kash'ah hitih yanamofihhi gupisaloh nohutogoh kehelileleh komopatiniguh lenagabuh'i meginoh. Lenalih kumuh yabeh luto lenele'moh fanah talubeh luto yah nohunagih lenofokehili loh.

### **Kilisitoh komopah'a limilinamofihhi hapa'a**

<sup>14-15</sup>Nani ananamomuh'i yah'mah kokulumaluguh neminana to meluguh neminana asagah'i lalih ah'a gih'a liluneh luto afotifuh lamana'ah lapusah fitoh lipih emitoh lenalih kumuh yabeh luto aitogah yah'mah luto lulata nohubeh. <sup>16</sup>Hu'mauh ah'ah fanah mehah'ah babuh luto hefuh tegih nih'inagutih ah'ah mehah'ah lenalitogah hoh lifinogoh limitoh amuyah'a lih hutuh huh lepinogoh kehelileh amuyah melelenogoh

ai'a komopatinigu hofa toto ule'ale hilibe luto loka nohobe. <sup>17</sup>To Kilisito kumu keheli amuya melenogo ai'a komopatinigu minoto mino amuya malalibe luto loka nohobe. To Kilisito komopa'a lepilinauba lufusatini limoto lenele'mo amuya lolo hinogo, <sup>18</sup>lenali to mono ka keheli'ahana bona'i luga'a hiti asaga'i Kilisito komopa'a lepi'ehinana yamofihi keheli amuya malalabe luto loka nohobe. <sup>19</sup>To Kilisito komopa'a limi'ehinamofihi hapa'auga yamofihi bona'magita keheli'ahana ya'ma be ligi fala'nala huto ni'ibe. Ya huto ni'inaya yamofihi sibigopa keheliya inogo Hu'mau asaga'nagu bai toto nominana bouba ana suhi huto lenali komopatinigu bai toto minalibe luto loka nohobe.

<sup>20-21</sup>Ai amuya'amofihi hapa'a lalitoga li huto hulata nohina bo Hu'mau, ai loka holata nohina bo to legekesa keheli'ohutana be ligitu huto hulata nohina bo Hu'mau ai'a fana meha'a sipi hu'ehinana asaga kene'magi kehelite koyapa koyapa foheha'a liba liba hite mineno. Ai'a ka'a keheli'ohuta bona'i Yesu Kilisito hiti moneko'na huto lele'mo lolo hu'ohutamomu'i foheha'a lino. Ma'naka.

#### Sikalafu'uba lele'mo hepi'ehinalo minalune

**4** <sup>1</sup>To ya higo nani Sipi Bomofi kumu luto naga nonugu nohunamofita lenegekesa lito lu lepilube. Hu'mau lamana hite minalabe luto lenele'mo'ehinamofihi hapa'a mege'i melete lamana hite minete lite hilo. <sup>2</sup>Ya nehite komopatinigu lelite limite fulunagu minete agoya hite minete mineme bite kosele'i melepehenogo komopatinigu epite ai he'mago ai he'mago hite minalo. <sup>3</sup>To fulunamofihi naga'atu mu tifi lepola'ehinamo ni'ibe. Ya'mu ya hite, naga'i laga hu lalaga ai kaba hu etenogo ai kaba hu etenogo hite nehinogo Hu'mamofihi Sikalafu'uba lenele'mo moneko'na hu'ehina suhi hite minalo. <sup>4</sup>Henabe lutobe? Lali ka'a kehelite nominotamagita Kilisito gufa'a tegi huto moneko'na alolo hu'ohutagihe. To ana huto Hu'mamofihi Sikalafu'uba moneko'na nohinagihe. To lali'i Hu'mau alihi hetofa suhi Kilisito tegi huto lele'mo lolo hilibe luto lele'mo'ehinamomu'i moneko huto lofokehi lito bu mego'ohuta fa'mene geba nohutagihe. <sup>5</sup>Sipi Boti moneko'i nohinagihe. To mono ka keheli amuya moloto mege'i mololata hiluta ka moneko'i ni'inagi to Kilisito kumu yabe luto nagami'i fololata nohutana moneko'i ni'inagihe. <sup>6</sup>To lali asaga bona'magita afotifu Hu'ma moneko'i nohinagihe. Ai'asigo mone'na silaga'namofihi Sipi Bo kibina bo minoto nohinagihe. Ai ya huto silaga'na kaba hulata nohibe. To asaga hepatoga hiti to asaga'namofihi komopagu moneko kumu minolata nohina. To asaga'nagu minoto lili'na'a lilata nohinagihe.

<sup>7</sup>Kilisitou ai kehelite li limilana legege huto lali moneko monekotoga ai'a lehe'mose'na'a limilata nohuto foya'a guna moloto limi'ehinamo ni'ibe. <sup>8</sup>Yamofi kumu ya'ma mono bukugu ka fayahi mone ma luto ni'ibe:

Ai ifoga notito naga nonugu nehana'a  
enele'moto ti'ehinamo ni'ibe.

To ya huloto

bona'magihi hetofana fato fato'na

li epi'ehinamo ni'ibe.

<sup>9</sup>Ifoga ti'ehinamofih i hapa'a ya'ma kaga henana ni'ibe? Ai me'mofih i komopa'agu limi'ehinaguti i behe huto ti'ehinamo ni'ibe. <sup>10</sup>To ai limi'ehina bo to aku'i i behe huto kokuluma kokuluma'i be ligito ti'ehina bo moneko'i nohuto yamofih i asaga melugu to kokulumagu mino бага ilube luto ti'ehinamo ni'ibe. <sup>11-12</sup>To hetofana limi'ehinamofih i hapa'a ma ni'ibe. Kilisitou lehe'mose'na'a fato fato'na limi'ehina ni'ibe. Lali luga'a aposolo lele'mo molo'ehinamo ni'ibe. To luga'a ai ka'a lu yege holata bo, to luga'a ya'ma ai'a ka leli'ali bo, to luga'a babafi minete ya'ma ka lamana'a lu ha'i fise bo, to luga'a mono kaba bo, lele'mo molo'ehinamo ni'ibe. Ana fato fato lili'nalo lehe'mose'na'a limi'ehina ni'ibe. To hena'mube? Lali Hu'mamofih i bona'a nohutamagita lili'natilo lele'mo amuya nohutamagita lele'mo hofa to su halibe luto yabe. <sup>13</sup>Ya humo humo hutoti mono ka mege'i malaluta'mu keheli moneko'i huto to Hu'mamofih i pana'amofih i hapa'a keheli bati huse'nati moneko'na lolo hinogo hulototi Kilisitohi bona'a hofa toto olopa hilitagihe. <sup>14</sup>Lali ya huto lagaso yagapana'i tegina meminose amuya moloto nohinogoti limi'i melelata bo enali faga faga li liminogo faga faga kamofih i yasi'auga lele'mo miyalo malo hinogo miyalo i ke'malupi malo i ke'malupi lu liluta hu laligi. Enali'i bona'i luga'amagihi enimi'i melete enele'mo keheli sibina nehana yabe. To laliya lele'mo keheli sibina hi lalabe. <sup>15</sup>Aku'i lali liginaga fi epito Hu'mamofih i kaga ma'naka luto ai lu eminogo ai lu eminogo hutoti ai latahati lolo huto nohina bo Kilisitotoga mino kikipa holototi fato fato suhi huto aitoga hofa talune. <sup>16</sup>Lali ya huto aitoga hepito minenogo ai kaba hu noletabe. To lali gumita'a fato fato nekisa'a moneko moneko nominenogo, ai fato fato nagatu lele'mo hepilago moneko gufa'a lolo huto nominone. To lali ya huto nohutogo fato fato nekisa'a lili'na'a li bati bati hulata nohigo ai ginaga fi emigo ai ginaga fi emigo huto nohigo gufa'a asaga'i moneko huto amuya moloto hofa notabe.

#### **Lali Kilisitohi bona'magita mino kosaba lemehi lilune**

<sup>17</sup>Yamofih i nani Sipi Bomofih i bulo lenegekesa lito lu nolepube. Hu'mamofih i ka'a mekehelilata boana'i enali enegekesa kehelilata nehana bati mehina fa'menena kehelilata nehabe. Enali tegi lolo hite meminalo. <sup>18</sup>Enali ya'ma komopa'ani enegekesa hokolo mehigo negi nagi nete komopa'ani hekini lolago fa'mene mine'ahana. Enali Hu'mau lele'mo bati huse'na'amofih i melise nehite enegekesa sibina higo mine'ahabe.

19 To komopa'ani fi hekini lo'ehigo ana'ina foipa faipanamofihii komopa'agu minete moko huse'na fato fato'mofi kumu enibita higo kosele'i meenehenogo enubuya mehinogo lolo hilata nehabe.

20 Lali Kilisitohi hapa'a lu nolepito lenali ya'ma suhi hite minalabe luto melepi'ohutamo ni'ibe. 21 Lali Kilisito kumu ma'naka luto lu lepi'ohuto ni'ibe. To lenali ai'a mege'i nemalana bona'i nehitetini Yesu lamana huto nominana hapa'a lusiga luto keheli'ahanamo ni'ibe. 22 Tafa lenemehi hite minete lite hago to lenugufa yauba faga hite luto lenimi'i mololata hu'ehinamo ni'igo lenali koyapa komopatinimofihii sibina hi'ahana. Ya hu'ehinagi tafa komopatini he'milo. 23 To komopatini lenegekesa kehelise'natini le'mo kosaba hinogo mineno. 24 To kosaba lenemehi li hepите minalo. Hu'mamofihii eto'ehina mehi to fotogo hu'ehina mehi tegi hite kosaba lenemehi hepите lolo hilo.

25 To ya higo lenali faga faga lilata hapatini he'milo. To lali asaga'i hepito Kilisitohi gufa'a lolo hu'ohutamo ni'inaya ya'mu kaga lamana kago ai lu eminogo ai lu eminogo hite minalo. 26 To lenipakafa lenehenogo foipana li lalabe lite mele'isi he'mite su halo. Lenipakafa lenehenogo mineba mineba hite nehinogo yege liminogo bati mehibe. 27 Satahi ya'ma kapo hekini lo etalo. 28 To gumina lilata hi'ahana bona'i lenali he'milete lenigigusa lenayatu amuya melete foya lite nose'natini f'enohatini li huto hite enumuhi menina bona'i enehe'mete leniginaga fi epite amuyatini hiti minalo. 29 Huli ka mone lenabagaguti mone melilo. Kaga lamana'a lite ai he'menogo ai he'menogo hilana kapomo sa hi lepalalana ka linogo enali katini kehelimana bona'i luga'a keheli bati hinogo enele'mo bati hilanagihe. 30 Hu'mamofihii Sikalafu'a le'mo ipagu sibina mehilo, yamofihii lenigiki ka lite le'mo felu kalu mehalo. Hena'mube? Hu'mau alihi kana napa'a huto hulenogomo lenalimoya gulu hoto fi hetofa hu letalibe luto Sikalafu'a yaga osahi tegi huto lepi'ehina ni'ibe. 31 Lenali enipakafa hose'na hiti to kenasabo bise'na hiti to enemegeka lite ya'ma asaga'i keheli he'milo. To luba lenegekesa mehino. 32 Lenali komopatini fulu hinogo ai ginaga fi emigo ai ginaga fi emigo hite minalo. Hu'mau ai'a Kilisito kumu yabe luto foipanatini li he'mi lepolo'ehinamo ni'igo lenali ana suhi hite foipanatini ai li he'mi etenogo ai li he'mi etenogo ihe'ma ahe'ma hite minalo.

### Fi besa lenogo minalune

**5** 1 Lenali Hu'mamofihii yagapana'a laga besi'ehinana'a lolo hite nehanagi ai babeyafalo minalo. 2 Ya nehite asaga bona kumu leniginaga fite minalo. Kilisito ai ana huto lali kumu yabe luto ginaga fito gufa'a sibi he'mi'ehina yamofihii Hu'mamofihii kuguhi koyo eminogo Hu'mau tu'a keheligo bati hu'ehinagihe.

3 To lenali'i moko huse'na to ai'i gumina folose'na to ananamo'mu yokolo ka luse'na to fato bomofihii nasana'a liba liba hilube luto lenipa



huse'na lenali folagahatinigu huto mehino. To ananamo'mu kaga lumofa'na mehilo. <sup>4</sup>To kolo tana ka yagi, negi nagi ka yagi, to kiya yokolo ka laga mehinana'a yagi lilana'ya laga mehilube'mu hibe. Hu'mamofitoga fokehi lite minalo. <sup>5</sup>Lenali ya'ma ka kehelite minalo. Moko lilata bona'i to anananamo'mu enipagu hilina bona'i enali Kilisitohi to Hu'mamofihhi kapolo minete lite metilana'mu yabe. To ana huto enali fato bomofihhi nasana'a lilube luto enipagu hilina bona'i enali ana hite ana kapolo metilana'mu yabe. To hena'mube? Enali Hu'mamofitoga enemehi meemise ma melugu nasanatoga enemehi emilata lugefa nasana suhi huto mege'i melelata nehana bati mehibe.

<sup>6</sup>To bona'i luga'amagi fi taga hi lepalalabe lite faga faga lite lu nelepinogo ka'ani mekehelilo. Foipa nasana yamofihhi hite minelata nehananamu'i enali'i Hu'mamofihhi keheli meemi'ahana bona'i enalitoga Hu'mamofihhi ita bise'na huto hilina'mu yabe. <sup>7</sup>Ya'mu lenali bona'i ya hana'a hiti mino hepiteminalo. <sup>8</sup>Lenali koyapa'i enali suhi hite metepugu mine'ahanamo ni'ibe. Yatai ya'ma Sipi Bomofitoga nehepitemehatini hiti lolo hite nehabe. Ya'mu fana mehenamofihhi legeya'a lolo hite yanamofihhi babeyafalo minalabe. <sup>9</sup>Fana mehenamofihhi legeya lamana'a ya huto hulata nohibe. Komopatini lamana'a hiti minose'na to fotogo huto minolatana to ka lamana'a lulatana yabe. <sup>10</sup>Ya'ma ana'ina lolo hilune luto lilana ya'ma Sipi Bouba kehelinogo bati hilina'muko sa hilo. <sup>11</sup>Luga'amagi metepunagu to futu'a lolo nehinogomo enali hiti mino mehepilo. Lenali ya'ma ananamofihhi'ya li fana tete li hokolo hi etalo. <sup>12</sup>Ana'ina suguna'i hite nehanana yamofihhi enubuya hulatana ni'inagihe. Yamofihhi kaga melilune. <sup>13</sup>To huto hulata nasana yauba fana nototo asaga'namofihhi okaba'a le'mo huto nohinana ni'ibe. To ya'ma le'mo huto hu'ehinamofihhi lusi hapa'a fana mehena hiti'na lolo nohigo bu galune. <sup>14</sup>Yamofihhi mono ka mone ma huto ni'inamo ni'ibe:

Lenubu'i ke'ahana bona'i  
lenali ho tilo.  
Fili'ahanaguti aho tilo.  
Kilisitou  
ya'ma fi besa lo lepalalube'mu hibe.

<sup>15</sup>Ya'mu lenali minete ho hite hilana ka ya'ma kaba lamana'a hite minalo. To negi nagi nete meminalo. Keheli fe hite yanagu minalo. <sup>16</sup>Yatai ya'ma kanagu foipa nasanamofihhi li fulugu bi'ehinamo ni'inagihe. Ya'mu ana'ina lamana'a lilata kana'a huto hu lepilinamo ya'mu lenebe meligino. Kana'a fa'menena lolo hu lalibe luto yabe. <sup>17</sup>Ka mekehelise bona'i lolo hite meminese Sipi Bouba foyaka lu lepolor'ehinamo yamofihhi bu go bebe sete bu gete minalo.

<sup>18</sup>Bai nagami'i nete negi nagi menalo. Ya'ma komopatini le'mo sibina hilinagi he'milo. To Hu'mamofihhi Sikalafu'uba ai komopatinigu mino bai

tenogo minalo. <sup>19</sup>To kaga ai lu emigo ai lu emigo hilata nehite Hu'mamofihite fokehi hete ya hite i'emi a'emi nama mono nama ai lu eminogo ai lu eminogo hite komopatinigu Sipi Bomofihite fokehi lite nama lite lenegelo biba biba hite minalo. <sup>20</sup>Ya nehite Sipi Boti Yesu Kilisito gi'a liyafa hite kana'amu kana'amu silaga'namu Hu'ma afotifihite fokehi hete minalo.

### Bo alobole etali hapa'atitimofihite ka

<sup>21</sup>Lenali Kilisito kumu keheli emite minete ai agoya hu emigo ai agoya hu emigo hite minalo.

<sup>22</sup>Ana'i lenali bahatinimagihite agoya hu epite minalana yauba Sipi Bomofihite agoya hu emi'ahana ya lolo hilina'mu yabe. <sup>23</sup>Kilisitou ai bona'magita latahati lolo huto minoto lele'mo nupa huto kaba hu letoto nohina suhi luto bona'magite liha'ani kaba hilabe. To Kilisitou lali ya'ma gufa'a nohutogo ai'asigoko lubuto bilata bo nohibe. <sup>24</sup>Ya'mu Hu'mamofihite naga'i lali'i Kilisito hite agoya hu emilata nohunogo ana suhi hite ana'i enali baha'animagihite agoya hu epilata hilabe.

<sup>25</sup>Bona'i lenali lihatinimagihite komopatinite epilo. Kilisitou ai lali ka'a nokeheluta bona'magite komopa'a lepito lali kumu luto gufa'a katiya'i huto fili'ehina suhi hite komopatinite epilo. <sup>26-27</sup>Kilisitou henabe luto gufa'a he'mito fili'ehibe? Ya'ma lali gufa'a nohuta bona'magite ai ka'aloti nagami okala hu letoto lele'mo eto huloto Hu'mamofihite bulo nugufa'ni lele'moto tilina kanagu bati huto, kolo tanana hiti to mone sibina sabana hinana hiti meni'igo gulu gulu luto lamana'a huto minalune lutomo ni'ibe. <sup>28</sup>To bona'i lenali lenalitini komopatinite mu leniginaga filata kaba nehanamo ni'ibe. Ana suhi hite, lihatinimagihite leniginaga finogo komopatinite epilo. Liha'amo ginaga finogo komopa'a emilata bo ai'a gufa ginaga filata nohinagihe. <sup>29-30</sup>To hiya bona'magite enugufa'ani'mu luba nehi etana nehabe? Menehabe. Lali bona'magite lugufate kaba hiluta lamana huto nose'na emite minose'na nominone. Lali Kilisito hite gufa'a nohuta'mu luto ai'a bona'a ana suhi huto kaba hu letolata nohibe. <sup>31</sup>Ya hu'ehina'mu mono bukugu ka mone ma luto ni'ibe: *Bo moneuba ito'afinogo afo'afinogo he'mi etotoloto liha'amofitoga buto i ke'moto etali'atiti etugufa'atiti keheli emite minete moneko'na lolo hite minala'ibe.* <sup>32</sup>To ana kamofihite hapa'a fala ki mino'ehina yamofihite Kilisito hite to bona'a lali kumu yabe luto nani nekese ya'ma nokehelube. <sup>33</sup>Ya hu'ehinaya ya'mu bona'i lenali silagatoga yamofihite lenugufatini'mu kehelilata nehana ya suhi hite lihatinimagite kumu kehelite leniginaga fi epilo. To ana'i lenali silaga'i ya'ma bahatinimagihite enigi'ani le'mo saga hite minalo.

### Yagapana'magite to ito'anigite afo'anigite lolo hite minete hilana ka

**6** <sup>1</sup>Panala'i panala'i lenali Sipi Bomofite kumu lite kehelite itotinigite afotinigihite agoya hu epite enali ka'ani keheli epilo. Yauba ya'ma

lenali kapo lamana'a hokolo nohibe. <sup>2-3</sup>Keya kaguti ana'ina huto hilibe luto molo'ehina kamo hiti kohe toto lu'ehina ka ni'ibe. Ma luto lu'ehinamo ni'ibe: *Lenali itotinigi afotinigihi enigi'ani le'mo saga hilete melugu mino bati hite kana'a yatama minoba minoba minalata'mu yabe* luto lu'ehinamo ni'ibe.

<sup>4</sup>To ito'anigita afo'anigita lenali ya'ma yagapanatini enele'mo enitaluga binogo li sibina mehilo. Lenali Hu'mamofihi ka'amua enegekesa linogo keheli fotogo hite kaga'a lu epilo. Kaba hi neepelenogo mono kagu hofa talabe.

#### **Kele kele bona'i enigina bona'i lolo hite minete lite hilana ka**

<sup>5</sup>Kele kele bona'i lenali metoga enikibina bomagihi koli hite agoya hu epelenogo ka'ani kehelinogo komopatini lamana hinogo Kilisitohi suhi hite agoya hi ete'ahanamofihi ya hite kehelilabe. To lenali kumu kehelinogo keta mehinogomo fulu hite minete kaga'ani kehelilo. <sup>6</sup>Lenaliya enikibina bo lenugufa lenemehi epite agoya nehi epelenogo yamofihi lenubu genogo bati hilibe luto ni'igopa lali Kilisitohi ya suhi kele kele'i hu etoto minalune lilete Hu'mamofihi fokehi lu lepalalina suhi hite minalo. <sup>7</sup>Bona'i lenali kumu keheli'ahana ni'igopa Sipi Bomofihi kehelite komopatinigu babahi hinogo foya'a kosele kasele mehese lilo. <sup>8</sup>Lenali ya'ma keheli'ahabe. Mone'a enali koko pana'a nehanana'a to enigihiti bo lolo hite nehana'a enali lamana'a lolo hite hi'ahanalo'i Sipi Bouba nona'a epilina ni'ibe.

<sup>9</sup>To lenali hiti bona'i lenali koko yagapanatinimagihi ana hite keheli bati hi epelete ana suhi hite enehe'mete luba ka lu meepilo. Ya nehite ma lite kehelilo. Koko yagapanatini hiti to lenali hiti ya'ma kokulumagu Sipi Bo afotinigu moneko'i nohibe. Ai enigihiti bona'i to enigi menina bona'i moneko legege nehabe luto kehelito bona'i silaga'i kaba hulata nohibe.

#### **Hu'mamofitogati gimimage'i luba nasana li lenayanugu malalune**

<sup>10</sup>Lu su hoto lilube. Hu'mamofitoga bite i ke'menogo ai amuyana'a napa huto lenalitoga ni'inogo yanamofihi komopa'agu mine lite tite ule'ale hilo. <sup>11</sup>To Satau ai suguna'i lenimi'i malalube'mu nohinogomo lenele'mo sibina hu lalibe luto Hu'mamofitogati gimimage'i luba nasana asaga'i li lenayanugu melelete minete kaba hite minalo. <sup>12</sup>Lenali ya'ma akeheli'ahabe. Lali fa'mene lugufa hiti bona'magita luba sabo menohune. Metepu kapo kaba nehana to Satahi kaba bo'a hiti enikibina bo sipi'a to sipi bo amuyana'a nehananamagi to foipa kene'i samahi tito kokuluma megesa'aga neminana enali luba li huto hu limilata nehabe. <sup>13</sup>Lenali yana'mu Hu'mamofitogati gimimage'i luba nasana lilete minete luba laga mehina'a amuya melete nehinogo fatehatini enali ete luba hilube'mu nehinogo lenali analo'i amuya melete minete koli mefelese ule'ale hite minalabe.

<sup>14</sup>Lenali ya hite ho ti kibi kibi hite minalo. To gimi bona'i nehepilata gu kata legi huto lenali Hu'mamofih i hetofa kaga'a gilimitini lolo hinogo gu katatini ho bite minete to ai'a bebe sose hapa'a kefe gutini lolo hinogo bite fonokotini kaba hinogo minalo. <sup>15</sup>To Hu'mau bona'i enele'mo fulu hilata nohina ka lamana'a lite minalana yanauba enigigusagu fegu lolo hu lepelenogo kapo melete minalo. <sup>16</sup>Yalo'i Hu'mamofih i keheli amuya emi'ahananauba helegutini lolo hinogo asaga yupahi so kite nehinogo Satahi gimiguti mage'mofih i logo'a bu nebe liginogo yanamofih i li sabalina'mu yabe. <sup>17</sup>Ya nehinogo Hu'mamofih i lenubuto bilatana kapaloti suhi huto kakili'i lolo hinogo yamofih i lite i kolo bilete minalo. To Hu'mamofih i kaga'a yauba emita'i yatama lolo hinogo yamofih i lite minalo. Ana emita'i Sikalafu'mofih i emita'a ni'ina yabe. <sup>18</sup>Ya nehite lenali silaga kanagu Hu'mamofih i Sikalafu'uba lenehe'menogo Hu'mamofitoga minete lehe'mobo lite buka tite minalo. To iyo iyo hite kosele'i kasele'i melenehenogo kaba hite minalo. Ya nehite Hu'mamofih i bona'i yege yege'namu'i yabe lite nunumu foya lite minalo. <sup>19</sup>Ya nehite nani kumu ya'ma nelesa melinogo Hu'mamo nabaga'ni le'mo babahi hulenogo hetofa ka lamana'a suguna'i ni'ina yamofih i nabaga li gelehe hinogo babahi hulenogo lu huto hilibe lite lenali Hu'mamofitoga lilo. <sup>20</sup>To nani ana huto hetofa ka lamana'a kumu yabe luto Hu'mamofih i kaga leli'ali hulata bo naga nonugu nohunaya Hu'mau lu netalina ka nelesa melinogo lu huto hilibe lite nani kumu Hu'mamofitoga kehe ilo.

#### Fayahi koyoto su halina ka

<sup>21</sup>Minoto lito nohuna yamofih i hapa'a to foya'a lilata nohuna yamofih i kehelilabe luto Tikiku ai'ya buto ka lu lepilube'mu nohibe. Ai lalalutifu lamana'a Sipi Bomofih i agoya pana'a foyagu amuya moloto mino'ehina bo yabe. <sup>22</sup>Ai lali malo nominana ka asaga'namofih i lenali kagalo lu lepito komopatini le'mo amuya hilibe luto ho lufugo foiya nobibe.

<sup>23</sup>Afotifu Hu'mau to Sipi Bo Yesu Kilisito ai nigibo nalalu'nigita lenali fuluna li huto huto molo lepoloto keheli amuya melelatanatini li futili hu lepelenogo komopatini ai eminogo ai eminogo hite minalabe. <sup>24</sup>Sipi Boti Yesu Kilisitotoga i hepinogo komopatini emilata nehana bona'i lenalitoga Hu'mamofih i lenehe'mose'na'a yamofih i minomo buto minalibe.